

## An general cuntaints cun la staschung



Er la politica è stada represchentada alla radunanza da delegos. (da san.) Leo Thomann, mastral da Surses, consigliere guvernativ Marcus Caduff, Tarzisius Caviezel, deputo e parsoura digl consegl grond scu er consigliera naziunala Anna Giacometti.



Franz Sepp Caluori, igl president da Gastro Grischun durant igl sies pled da bavegna. Fotos Gion Nutegn Stgier

Gion Nutegn Stgier/FMR

**Igls ustiers grischuns on gia, tiers la paca neiv, ena betg schi mala staschung. Chegl è nia alla gleisch tar la radunanza da delegos da Gastro Grischun da marde a Savognin. Personal qualifitgia mantga anc adegna ed igl madem sa mossa tigl cutier per ampluias dalla gastronomia.**

Gastro Grischun è l'uniun tgi reunescha igls 998 ustiers digl noss cantun tgi dereivan da 16 secziuns. Parsoura dall'associaziun tgi dat gio siva digl 1914 è siva digl 2015, Franz Sepp Caluori (Coira). El è er deputo dall'Alleanza digl Center ed è uscheia en bung feil er tar la politica e betg angal tar la bransch da gastronomia sezza. Magnafatschenta da Gastro Grischun è Marc Tischhauser (Domat). Sa radunos a Savognin èn 150 delegos, delegadas e giasts per salvar la 109avla radunanza da Gastro Grischun. Preschaintas èn er stadas ples persungas dalla politica, dall'economia e digl turissem. Represchento la regenza grischuna è consigliere guvernativ Marcus Caduff. Gia li è la radunanza agl «Jufa Hotel» ed igl gientar agl hotel Piz Mitgel.

**Metter er igls ampluias pi ferm aint igl center**

Per catter personal qualifitgia avonda exista nigra schliaziun ideala è punctuo Franz Sepp Caluori. Er a curta vista existan nignas schliaziuns per migliurar la situaziun da persungas qualifitgeidas. Ideias seian bagn avant mang, ma decisiv seia da realisar chellas e chegl an cuminanza, è menziuno igl

president da Gastro Grischun. D'augmentar l'attractivitat scu patrung seia igl nov marketing. Betg angal igl giast duess star aint igl center, mabagn er igls collaboratours e las collaboratouras, è managea Franz Sepp Caluori. Augmentar la productivitat cun nizigier las pussebladads dall'automatisaziun per pudeir porscher igl madem sarvetsch ed incantar igls giasts er cun pi pac personal. Sen scalem statal duessan pensiunos neir deliberos dalla taglia da gudogn, uscheia tgi stessan, aglmanc parzialmaintg, anc a disposiziun ad ustiers e hoteliers scu ampluias. Bungas cundiziuns da basa per structuradas digl de favorevlas tg'èn disponiblas er la seira e la fegn d'emda mantgan. «Indispensablas èn er la modernisaziun e la flexibilisaziun dallas cundiziuns da basa digl dretg da luvrar», è detg Franz Sepp Caluori. Da promover seian er cooperativas per la construcziun d'abitaziuns, per tgi dess duple abitaziuns paiablas per personal ed er per indigens. Ultra da chegl vessigl d'esser pussebel da duvrar bagn immobigliars nunutilisos ainten zonas d'industria per far or da chels abitaziuns per personal e per indigens, è detg igl parsoura da Gastro Grischun. El è schizont nia concret e detg tgi chegl savessan esser bietgs communal veids, scolas e schizont hotels. Pignier an mang chegl seia angal pussebel an collaboraziun cun oters partenaris ed er cun otras branschas, è managea Franz Sepp Caluori. El è er menziuno tgi la gastronomia grischuna dovra aint igl avigneir generalists e collaboratours e collaboratouras flexibels. Ultra da chegl savess er la gastronomia aint igl Grischun profitar da persungas tgi fon ena midada professiunala, schinumnos «Quereinsteigers» u magari er da persungas

tgi dereivan digl exterior e fetschan en amprendissadi scursania.

**La gastronomia grischuna è ena ferma pitga**

Leo Thomann, igl mastral digl cumegn da Surses è purto igls saleids dalla populaziun all'antiera raspada radunada. An pled e malletg è el preschento igl cumegn. A pled è er nia Tarzisius Caviezel, igl president digl consegl grond. La gastronomia grischuna seia d'immensa impurtanza pigl turissem, per l'economia ed er per l'identitad digl Grischun. El vegia grond respect digls bungas hospitants e dallas bungas hospitantas ed er da lour labour, è punctuo igl pi «ot» Grischun. La gastronomia seia er ena bransch represchenta quasi ainten mintga vischnanca e chegl seia en fatg plaschevel. Massimo Suter, igl vicepresidente da Gastro Suisse è detg tgi betg angal tar la gastronomia e la hotellareia mantga personal qualifitgia er an otras branschas seia chegl igl cass. Chegl er schi vigna pretendia davart dallas medias tgi chegl seia igl cass angal tar la gastronomia.

**Gia ena bunga staschung**

An discurs cun ples ustiers ed ustieras è sa musso tgi els ed ellas èn an general cuntaints cun la staschung d'anviern tgi sa catta ainten la fasa finala. Ins vegia bagn profito dalla paca neiv cun renunztgier blers giasts agl eir cun skis e persiva eir orsoura a gientar u a tschagna. Er chegl tgi pertotga la consumaziun vegian igls giasts betg vurdo segl prietsch e pusto savens angal igl migler or dalla cuschna ed igl pi bung or digl schler. Plagn speranza èn ustiers ed ustieras er tgi detta ena bunga staschung da stad, schinavant tgi l'ora sa preschainta scu igls davos meis.